

鄉土志業編

張國淦署



神木鄉土志目錄

卷一

天文

一

地理

一

山川

三

邊外屬地疆域

五

邊外屬地山川

六

營造

八

封爵

一〇

卷二

職官

一

貢賦

一

學校

二

祠祀

三

選舉

五

封廕

八

兵防

一〇

卷三

軍事

一

郵政

四

水利

四

鹽法

四

茶政

五

物產

五

卷四

風俗

一

祥異

三

名宦

三

人物

五

陵墓

一一

古蹟

一一

經籍

一二

金石

一二

藝文

一二

拾遺

一二

志異

一三

神木鄉土志卷之一

天文

經度

神木縣在北京偏西六度

緯度

神木於北極出地爲三十八度五十五分

節氣時刻

神木於順天府節氣時刻應減一刻九分因神木在偏西六度每度當四分共爲二十四分故於順天府節氣時刻應減一刻九分榆林府城在偏西七度其節氣時刻則又較此爲先矣

太陽冬夏出入晷度

北極高一度則地面差二百五十里而寒暑密移晝夜之短長各異神木北極高

三十八度五十五分與順天府較之僅差一度則冬夏太陽之出入亦僅差四分而已

附神木氣候

神木氣候寒甚良以地處極邊風勁烈寒春秋二季稍微溫和冬夏二季寒暑過甚至其風向則春秋冬三季多北風夏多西南風每年之間東風甚少雨量以常年計之夏多霖雨秋多霪雨冬多積雪逢春雨少然而遇雨成雪因氣候過寒職此之故耶

地理

建置

神木唐時爲麟州前明正統八年移建縣城於屈野河之東岸是爲今治 國初因之雍正時隸於葭州乾隆元年罷葭州直隸與縣同屬於榆林府二十七年析葭州之高家堡趙家石畔等村隸神木迄今再未升設析置改換名稱縣境原轄四堡今大柏油堡已廢僅有其三 詳後疆域中

神木東薄黃河西逾秃尾南通葭蘆北鄰蒙古屈野河縱流於中古長城橫蔽於外山川險要亦形勝之區也志疆域山川

疆域 附地形 位置

神木縣境東至邱家寨六十五里與府谷縣之劉家大寨連界西至高家堡雙謀梁汛一百二十里與榆林縣水掌上村連界南至黃河岸張家川一百四十里北至五盧口邊牆十里與蒙古郡王旗夥盤地連界東北至永興堡暗門峁八十里與府谷縣萬家墩連界東南至彩林一百三十里與府谷縣錯壤連界西南至屈家南溝一百二十里與葭州之謝家溝連界西北至高家堡閘門一百一十里與蒙古五勝札薩克台吉兩旗夥盤地連界東西相距一百七十里南北相距一百五十里面積約一萬五千餘方里編戶四里三十三甲領堡三寨十六寨 今廢置詳後堡 分列於左

永興堡 縣東北五十里明成化中巡撫余子俊遣鎮羌指揮宋祥置土城在山  
上後萬歷間用磚包砌今塌損僅剩土城

柏林堡 縣西南五十里明成化初巡撫盧祥置土城在山原萬歷間用磚包砌今已坍塌

高家堡 縣西南一百三里有禿尾河東岸明正統間巡撫陳鑑建後余子俊展修磚城 國朝乾隆十五年知州祖德宏請修二十七年撥歸神木三十三年知縣方萬年重修今城垣尙固城內戶口盈密街市之間貿易頗繁但不及往日之盛耳城外山水環拱與縣城形勢相似有都司一員屯住其中

地形

神邑地形東寬而西狹若自縣城至南境之張川作一線則東似一長方形西似一三角形

位置

神木在北京之西南西安省城之正北榆林府城之東北府谷縣城之正西距北京一千五百四十里距西安一千六百二十里距榆林二百五十里距府谷一百七十六里

山川

神邑之山脈可分爲東西兩大支在屈野河與府谷縣河之間者爲東支山脈在屈野河與禿尾河之間者爲西支山脈西支以柏林山爲分水嶺山東之水流入屈野河山西之水流入禿尾河自柏林山蜿蜒而東南至黃河岸而止縣城之西山柏林堡之點軍崖高家堡之興武山疊翠山及屈野河西岸之石盤頭山均西支山脈之屬也東支東至府谷縣河入黃河處沿河而下至縣屬之天台山而止縣城之東山永興堡之響石崖臥牛峯皆東支山脈之屬也謹將上所載有名之山分詳於左

東山 城東一帶高岡名曰東山距城僅里許袤長二十餘里最高處約七十餘丈下石而上土縣舊城卽在此山之上今遺址猶存都人士於此山之曲折巉巖處別其名曰香爐山 前明武宗賜名鳳頭山 龍眼山 一峯伸出形似龍頭中通二竅玲瓏可觀虎頭山 一巒兀峙若虎蹲然 錦屏山 諸峯排列嵐光蒼翠若錦屏然 紗帽山 狀似紗帽展

翅故名 白龍寺山 因古建白龍寺於山頂故名在縣南十里紗帽山在縣東南七里餘皆距縣城一

二里其實一山也

西山 縣西奇峯矗立名曰西山距縣僅隔一水長約里餘高可六十餘丈山係石質強半爲飛沙覆壓惟向南伸出一峯細狹竦峻狀若駝峯名曰駝峯山 明武宗賜名筆架山以及縣西北四里之鐮子山縣西六里之滴水崖首與西山相連特隨地異其名耳

石盤頭山 在縣南六十里屈野河西岸長約里許高約八九十丈

柏林山 在縣西南五十五里長六七里斜高約三里上有武廟周圍古柏參天蒼翠如蓋人不敢伐亦不知其數土人謂之關王崩柏林堡即在此山之上

點軍崖 在縣西南八十里柏林堡南三十里爲柏林河發源之處

興武山 一名無量山在縣西高家堡南里許勢極險峻約高六十餘丈上建真武廟旁有榆陽士人王興大書塞北蓬瀛四字筆力遒勁下峭壁間有縣處士王萬清大書山河永固回字

疊翠山 在興武山西南石崖中有石洞開戶牖數處同治七年回匪之亂土人

曾避難於此

臥牛峯 在縣東北永興堡南十里

響石崖 在永興堡西十里

天台山 在縣南一百三十里山極崇峻樹木蒼翳上建梵宇九層高約二百丈  
虎峪 在縣西高家堡西五里禿尾河西黃沙中突出山石一塊高可五十餘丈  
面東石壁上有石洞數處同治七年土人避難其間獲全者甚夥

屈野河 一名窟野其源有二一出自郡王旗打拉抗台東合榆樹壕水西南流  
十里會討索免溝水爲犂牛川又西南流一百三十五里有房子溝水東來注之  
又四十八里至沙河岔與沙河合自源至此已一百九十二里一出自郡王旗烏  
藍峯地方南流二百里有忽機兔溝水西來注之又五里有哈拉卜哈溝水東來  
注之又南流四十五里名沙河川又南流四十五里至沙河岔與犂牛川水會自  
源至此已二百九十五里二水會合名爲屈野河東入黃羊城溝水西入考考五  
素溝水又二十里有楊家城北草地溝水東來注之又三十里至五盧口入邊又

十里經縣城西又一里有兔兒溝水一名芹河西自口外青草澗東南流遶駝峯山來注之又四里有泗滄河東來注之又五里大柏油河東來注之又十里柏林河水自西北來注之又計一百二十里至府谷縣屬之沙峁頭入黃河計自兩源會合自入黃河長二百里然水勢游揚不勝舟楫且水利未興縣城左右雖有膏壤不能資以灌溉洋洋河水無益於人惜哉

禿尾河 在縣西高家堡西門外初源實爲榆林縣屬之建安堡口外今所名禿

尾河之溝溝掌

禿尾之溝下游卽紅柳河溝

嗣蒙地開闢深入其地始知禿尾河之正

源爲滾泊爾海子亦猶揚子江初以岷江爲源後以金沙江爲正源也滾泊爾海

子四圍沙堤水無所洩伏流七八里至哈卜塔河掌由草內湧出至窰鎮俗名哈

卜塔窰子

西入圪丑溝水南流二十里東入東母夥溝水西入西母河溝水又五

里西入黑龍溝水又五里西入采免溝水東入神樹溝水又二十里西入惡水溝

水東入轉龍灣水又十七里至暗門口入邊西入紅柳河水水量始大又三里東

入金剛溝水又十里東入永利河水由高家堡西遞南十里至小邊墻入葭州境

又東南流一百一十里至宜和溝遶惠崖入黃河計長二百里自高家堡以上水勢散渙深者不逾二尺淺者僅沒馬蹏兩岸最闊處約有三四里均爲水佔不能耕種亦無益有損之水也

水道提綱云黃河流至神木東南界有禿尾河西北自神木邊外來合屈野河東南流注之今案禿尾河之處與屈野河入河之處相距最遠疑水道提綱誤響石崖川 在縣東北四十里源出永興之山神廟溝由石壑子入屈野河

泗滄河 在縣東南四里源出府谷縣至縣五十里之劉家圪塔入境遶呼家圪臺灌園地數頃入屈野河

大柏油河 在縣西三十里其水有二一源出口外由大柏油堡東邊墻入口東南流經距縣十里之李家灣入屈野河古名大柏油即此一源出堡西邊內南流至解家鋪入柏林河

柏林河 源出點軍崖下北流合關王峁溝水爲柏林河東南達二十里鋪入屈野河

永利河 在縣西八十里其源有二一出口外一出水洞至青陽岔合流而西經高家堡入禿尾河

長澗川 在縣東六十里

水磨川 在縣南二十里

黃河 在縣南一百四十里東至府谷之彩林入境流十里至府谷之山塢出境中有山坡渡又自府谷之沙峁入境西流十五里至葭州之羅家峪出境無渡口河岸共二十五里水量最大但中有礁不便大船僅通行小舟而已

西豆峪水 在縣西南一百里源出封水村南流二十里入葭州境

彌勒川 在縣西南一百二十里源出屈家南溝南流十里入葭境

菖蒲灣水 在縣西南一百里西流二十里至李家灘入葭州境

邊外屬地疆域 附開墾始末

神木邊外屬地於乾隆八年各旗貝子等以人民種地越界外游牧窄狹等情呈報理藩院行文川陝總督飭司核議後奏蒙 欽差理藩院尙書班第大學士公

川陝總督慶復前詣榆林會同各札薩克等定議於舊界外再展二三十里仍以五十里爲定界及乾隆二十八年高家堡撥歸神木則神木邊外屬地東起永興堡邊外西迄高家堡邊外已延袤二百五十餘里近數十年中蒙旗屢次展界疆域之廣數倍於往昔光緒二十九年經前督墾大臣貽穀奏明至活機兒免溝南畔已墾之地仍歸陝西各州縣分管而神木邊地始有定界東至郡王旗特牛川西石板而泰東南大榆樹梁與府谷邊外屬地交界距縣一百零八里西至札薩克旗小保黨與榆林縣邊外屬地交界距縣城一百四十里北至活機兔溝南畔與東勝廳轄地交界距縣一百四十里東北至郡王旗雙兒廟迤東偏北石圪臺地方與東勝廳交界距縣一百六十里西北至阿包免與東勝廳境交界距縣一百八十里東西相距一百五十里南北相距一百四十里面積約二萬一千餘方里然疆域雖廣而近邊數十里間半成不毛之地登高一望平沙無垠惟有河之處資水灌田房民尙多此外間有可耕者即爲沙漠田邊外有沙漠田者能生黃蒿俗名沙蒿生既密頻年葉落於地籍以肥田如是或六七年或七八年蒿老而地可耕矣然僅種黍兩年兩

前水經二  
年後復令生蒿互相輾轉至成黃沙而止 又有名爲灘地者地質潮潤能產五穀但周圍隆起無出水之道猝有淫雨即一片汪洋矣

邊外開墾始於康熙三十六年迨五十八年始立定界址有沙者以三十里立界無沙者以二十里立界及乾隆八年再爲展界將清初禁留地五十里均爲開墾當時尙爲夥盤地令民春出冬歸迄今近二百歲所墾愈廣距邊愈遠父老子弟生長於斯聚族於斯幾若忘其爲邊外也者今自光緒三十年山陝之界址既定則固墾之無可墾者雖邊外而儼若內地矣

### 邊外屬地山川

神木邊外本無大山大川然於沙漠中偶峙土崗足壯觀瞻偶有細流足資灌溉山固不在高水固不在深也謹將邊外山川分詳於左

舉人山 距縣城七十里峯巒秀茂前朝出有舉人故名

阿齊圖山 距縣城一百里

寨崩山 距縣城六十里明季於此立寨以禦套人

磁窰溝山 距縣城八十里

禾地山 距縣城七十里

木瓜山 距縣城一百二十里

東石山 在縣西高家堡北偏西二十五里於黃沙中突出一石其色紅高約二十餘丈上有清泉亦邊外之一觀也

西石山 在東石山之西相距約八九里與東石山形勢相似惟無泉而已

柴家梁 距縣城十五里東臨大川西繞柴溝上有土墩高大勝於他處四面山峯皆在其下俗名墩塢

孫元家梁 距縣城一百一十里與府谷錯壤

雙柏樹梁 距縣城一百三十里

犍牛溝河 距縣城一百里卽屈野河東源

沙河川 距縣城九十里卽屈野河西源

水磨河 一名清水河源出蘆草溝東南流入屈野河在縣北十五里

老龍池 距縣城十八里沙崗石磧下一泉涓涓不絕清澈可愛東流十里至梁家園入屈野河

可可五素川 距縣城六十里源出札薩克旗傍界之紅水泉東南流入屈野河

紅柳溝河 距縣城一百三十里高家堡西北三十里源出榆林縣牛角灣邊墻

外禿尾之溝溝掌東南流入禿尾河此水灌園地甚多

青楊樹溝 在高家堡東北三十里距縣城八十里源出木瓜山至轉龍灣與轉

龍溝合入禿尾河此水灌園地甚多

圪丑溝 在高家堡西北一百里源出於圪丑溝海子東南流四十里入禿尾河

惡水溝 距縣城九十里在高家堡北偏西東流入禿尾河此水灌園地六七頃

黑龍溝 在高家堡西北東南流入禿尾河此水灌園地亦多

采兔溝 距縣城九十里東南流入五里入禿尾河

活機兔溝 距縣城一百四十里入屈野河此爲山陝界河

紅水泉 距縣城九十里沙磧下出泉數股水底紅石相映其色嫣然